



Inatsisartunut Ilaasortaq Laura Táunâjik
Siumut

Tunumi mittarfiit pillugit § 37 naapertorlugu apeqquteqaatit

Asasara Laura Táunâjik

01-06-2015
Sags nr. 2015-115116
Dok. nr. 1980228

Aallarniutigalugu Ittoqqortoormiini Tasiilamilu mittarfinnik sanaartornissamut pilersaarutit pillugit apeqqutinnut qujanarujussuaq. Mittarfissat inunnik angallassinermut nassiussanillu assartuussinermut ullumikkut siunissamilu atuisunut annertuumik siuariartitsisussaammata isumaqatigaakkat. Naluneqanngitsutut siunissami attaveqaatit nunap immikkoortuisa akornanni iluinilu pitsaanagerusumik ataqatigiissinneqalernissaat, aammalu atugarissaarnerulernissamut annertunerusumillu naammassisaqarsinnaalernissamut tapertaanissaat, minnerunngitsumillu takornariaqarnerup inuussutissarsiutillu allat iluini ineriartorfiusinnaasunik pilersitsiviunissaat Naalakkersuisunit pingaartinneqartorujussuuvog. Kiisalu siunissami attaveqaatit angalasut apuuffissaminnut toqqaannartumik angalasinnaanissaannut periarfissaannut sapinngisamik annertunerpaamik tapertaanissaat immikkut anguni-agaavoq.

Postboks 909
3900 Nuuk
Tlf.: (+299) 34 50 00
Fax: (+299) 32 52 86
E-mail: isan@nanoq.gl
www.naalakkersuisut.gl

Aamma taamatut ineriartortitsinermit suliffissanik pilersitsisoqartussaavoq – sanaartornerup ingerlanneqarnerpiaanut atatillugu, taamatumalu malitsigisaanik inuussutissarsiutinik ineriartortitsinermit atatillugu.

Maannarpiaq mittarfiliortiternermit suliassat assigiinngitsut inerisaaffigineqarnerisa killiffii assigiinngisitaarput, tassalu Tasiilami Ittoqqortoormiinilu suli misissoqqissaagassat arliupput, taakku suliniutit tunngavissaannik pitsanngorsaassutaasussat suliassaapput. Taamaattumik matuma kinguliani apeqqutinnut akissutikka, Naalakkersuisoqarfimma maannarpiaq suliassanik piginnaanngorsaaqilluni suliaqangaatsiarnera eqqarsaatigineqarluni atuarneqassapput. Kiisalu matuma kinguliani allassimasut soorunami suliassat piviusunngortinneqarnissaannut Inatsisartut taakku pillugit aalajangiinissaat ataqqillugu atuarneqassapput.

1. Tasiilami Ittoqqortoormiunilu mittarfiliortiternermit sanaartortoqalernissaa qaqugumut pilersaarutaava?

Akissut: Matuma siuliani allaaserineqartartut mittarfiliassat marluusut ineriarnegarnerini killiffiit assigiinngitsorujussuupput. Mittarfiliortoqassatillugu sanaartornerit aallartinneqarnissaanissaannut pissutsit amerlasuut itisilerlugit misissorneqartartussaapput.

Ittoqqortoormiinit tunngatillugu 2016-ip ingerlanerani misissueqqissaarnerit pilersaarusernerillu naammassineqarnissaat Naalakkersuisunit anguniarneqarpoq, tamatumalu kingorna sanaartugassat 2017-imi aallartinneqarsinnaalissapput, aammalu 2019-imi naammassineqarnissaat naatsorsuutigineqarpoq.

Tasiilami sanaartorluni sulinerup aallartinnginnerani misissoqqissaagassat naammassineqaqqaartariaqartut arlaqarput . Taakkununga ilanngullugit inissiiffissatut periarfissat nalilersorneqassapput, matumani ilanngullugit mikkiartortarnermut pissutsit aammalu anorip silallu pissusai. Inissiiffissamik toqqaanissamat anorinik silamillu misissuinerit apeqqutaasussaapput, taakkulu ukiut tallimat tikillugit sivisussuseqartussatut naatsorsuutigineqarput. Aatsaat tamatuma kingorna sanaartugassarpiaat aallartinneqarsinnaapput, taamaattumillu Tasiilami mittarfiliornissaq siunissami ungasinnerusumi pisussaavoq.

2. Tasiilami mittarfeqalerpat Kulusummi mittarfik sumut atorneqarsinnaassava?

Akissut: Tasiilami mittarfiliornissamat Naalakkersuisut pilersaaruteqarneranni, tunngaviusumik Kulusummi mittarfiup atorneqarnerata ingerlaqqinnissaanut isummertoqanngilaq. Ataatsimut isigalugu nutaanik mittarfiliornermi sapinngisamik annertunerpaamik ineriartorfiusinnaasunik piviusunngortitsiniarnissarput uannut pingaarneruvoq. Isumaqarluinnarpunga, Tasiilami mittarfiliornermi angalasartut amerlanerpaat tassunga ingerlasarnerat ineriartortitsiviusinnaasunit piviusunngortinneqarsinnaasut annersarigaat. Tamanna Kulusummut angalasartunut sunniuteqassasoq ilimanarluinnarpoq, taamaattumillu taamanikkussamat Kulusuup mittarfiata atorneqarnera tunngavigalugu ingerlatsineq naleqqussarneqassaaq.

3. Ittoqqortoormiuni mittarfeqalerpat Nerlerit Inaanni mitarfik sumut atorneqassava?

Akissut: Ittoqqortoormiini mittarfimmuut tunngatillugu Tasiilamut sanilliullugu pissutsit allaanerulaarput. Nerlerit Inaat illoqarfiunngimmat nunaqarfiunngimmalluunniit inunnillu najugaqarfigineqarani, tassunga angallanneqarnissamik pisariaqartitsisoqannginnera tamatumunnga peqqutaavoq. Aamma Nerlerit Inaanut timmisartuussinerup ingerlaannarnissaa ineriartortitsiviusinnaasunik pilersitsinissamat ilimanaateqanngilaq.

Taamaattumik Ittoqqortoormiini mittarfiliornermi Ittoqqortoormiinit toqqaannartumik timmisartuussisarnissaq siunertarineqarpoq. Tamatumunnga atatillugu nunap immikkoortuanut mittarfik isaariaq Mestersvigimut nuunneqassaaq, tamanalu pissutigalugu naalakkersuisoqarfimma maannarpiaq tamatumunnga isumaqatigiissusiornissamat siunnersuuteqarnissaq pillugu danskit oqaloqatigaat.

Taamaattumik aalajangersimasumik siunniunneqarpoq, Nerlerit Inaat atorunnaarsinneqassasoq, aammalu atortut il.il. Ittoqqortoormiini mittarfimmuut nutaamut nuunneqassasut.

4. Tasiilami Ittoqqortoormiunilu mittarfeqalerneratigut illoqarfinnut pineqartunut takornariat qanoq amerlatigisut tikittalernissaat naatsorsuutigineqarpa?

Akissut: Mittarfiit marluusut sananeqarneri ataatsimut immikkullu takornariartartut akulikissusaannut pitsaasumik sunniuteqassasoq naatsorsuutigineqarpoq. Ullumikkut takornariat, Kalaallit Nunaannut tikeraarnissaminnik kissaateqartut amerlapput, taakkunungalu minnerunngitsumik Islandimiit takornarianik, angalanerminnut ilagitillugu Tunumut tikeraarnissaminnik kissaateqartartunik peqareerpoq. Mittarfiit marluusut sananeqarnerisigut ineriartorfiusinnaasumi tassani anertoq piviusunngortinneqarsinnaavoq – pingaartumik Tasiilami, maanna attaveqaatinik tapertaasussatut pisariaqartinneqartunik peqariinngikkaluarluni takornariarfigineqartareersumi.

5. Tasiilami Ittoqqortoormiunilu mittarfeqalerneratigut illoqarfinni pineqartuni inissiisarfeqarnikkut annertussaasoqassava?

Takornariartartut amerlinerisa kingunerisaanik inuussutissarsiutinik assigiinngitsunik inerisaanissamut namminersortut suliniuteqarnissaat Naalackersuisunit naatsorsuutigineqarpoq. Tamatuma aamma unnuisarfiusinnaasut amerlinissaannut atuunnissaa naatsorsuutigineqarpoq.

6. Tasiilami Ittoqqortoormiunilu mittarfeqalerneratigut illoqarfinni pineqartuni suliffissat qassit sumullu sammisut pilersinneqarnissaat naatsorsuutigineqarpa?

Akissut: Attaveqaatinut tunngatillugu suliassat eqqarsaatigineqartut kingunerisaannik suliffissanik pilersitsiniarluni – taakkunungalu suliassaqartitsinissamut periarfissat amerlassusaat suussusaallu ilanngullugit – ineriartortitsinissamut tunngasut ersarissumik oqaatigissallugit suli ajornakusooput.

Kisiannili sanaartornerpiaq sanaartornerup iluani sulisussanik assigiinngitsorpassuarnik, kiisalu ingeniørit ilisimatusarneranni timmisartunullu teknikkeqarnermi piginnaasaqartunik toqqaannartumik pisariaqartitsinermik, aammalu kiffartuussinermi tuniniagaqarnermilu toqqaannangitsumik pisariaqartitsinermik kinguneqassasoq naatsorsuutigineqartariaqarpoq. Tamatuma saniatigut sanaartornerit naammassippata kiffartuussinermi tuniniagaqarnermilu, pingaartumillu takornariaqarnermi suliaqartitsinissamut periarfissanik pilersitsisoqarnissaa naatsorsuutigineqarpoq.

Apeqqutinut 4-6-imut tunngatillugu matuma kinguliani Naalackersuisut naatsorsuutigaasaat, sulianut aalajangersimasunut, maannarpiaq atugassarititaasut ilisimasaqarfigisakka tunngavigalugit nassuiaateqarfigaakka. Suliassat ineriartornerisa ilutigisaannik soorunami apeqqutinut eqqornerusumik akissuteqartoqarsinnaalissaaq, taakkulu Inuussutissarsiornermut, Niuernermut Suliffeqarnermullu Naalackersuisumut ingerlatinneqarpata iluaqutaassaaq.

Neriuppunga matuma siuliani akissutikka apeqqtinnut naammaginatsumik akissutaasasut.

Inussiarnersumik inuulluaqqusillunga

Knud Kristiansen